

**Transparency
International tassaavoq
nunarsuarmi peqquserlulluni
iluanaarniarnermut akiuisuni suliniaqa-
tigiiffik annersaat. Suliniaqatigiiffik 100-nik
sinnilinnik nunarsuarmi immikkoortotaqarfe-
qarpoq Berlinimilu allattoqarfeqarluni. Peqqu-
serlulluni iluanaarniarluni ajornartorsiutit pillugit
uppernarsaallutalu eqqumaffigineqarnerulernissaa
sulissutigaarput; naalagaaffiit, inuussutissarsi-
ornermik suliallit inuiaqatigiillu suleqatigaagut
peqquserlulluni iluanaarniarnermik
akiuisunik aaqqissuussanik
atortuulersitiniarnermik
suliaqarluta.**

SIULEQUT

International Greenland (TIG) 2011-mi sulisitsisunit, inatsilerituunut ilisimatuunillu pilersinneqarnikuuvoq. 2022-milu akuerisaaqqilluni, tamannalu tulluusimaarutigeqaarput.

Nunarsuaq tamakkerlugu suliniaqatigiiffinnut, ataatsimut anguniakkatigut periusissamik suliaqarsimasunut, Holding Power to Account 2021-2030-mik taaguutilimmut peqataavugut. Taanna tunuliaqtsiullugu KalaallitNunaanni 2021-2025-mut periusissioinikuuvugut.

Nunarsuaq tamakkerlugumut suleqateqarnissarput pingaarteqaarput, misilittakkatsinnik avitseqateqartarnissarput eqarsaatigalugu. Tamannarpiaq pissutigalugu ukioq manna Transparency International aqutigalugu marloriarluta ataatsimeersuarnerni saqqummiilluta peqataaffeqarpugut. TIG tunuarsiimaartuunngilaq avataaniik tikeraaqartillugu peqataasarnissanut, tusagassiorfinneersuuppata, ambassadeqarfinninngaanneersuuppata EU-meersuuppataluunniit.

Taamaattumik aamma TIG avataaniik tikeraanik ataatsimeeqateqarnissaminut ammavoq, soorlu amassadeqarfinni atorfilittanik EU-minngaanneersunilluunniit.

Uagut maani immikkut soqtigisaraarput inuiaqatigiinni sutigut tamatigut akimut ersarissaanerup isumaata/sunniutaata sumiinnera maluginiarnissaa paasisaqarfiginissaalu. Taamaattumik TIG ukiup ingerlanerani oqalliffinni peqataasarsimanermi saniatigut seminareqartuni ataatsimeeqatigiittuni saqqummiarsimavoq.

Saqqumilaarusulluta akimut ersarisaasariaqarneranillu oqariartuutilittut malugitikkusunnerput takutikussullugu ukiup

ingerlanerani tusagassiuutitigut sammisanut oqaaseqaateqartarsimavugut. Taakkua saniatigut apeqqarissaarfigineqartarlutalu tusagassiuutitigut immersuuteqallattaasarnikuuvugut ataatsimut isigalugu qanoq peqquserluuteqarsimasut iliuuseqarfigineqarsinnaanerannik tikkuussisunik.

Immikkut taasaqassagutta 2022-mi pingasut sulinitsinni inipunukut uku taasinnaavagut.

1. Tatigeqatigiinnissamut ukkassinertigut. Pisortat politikkerillu inuiaqatigiinnut iluaqutaasussaq anguniarlugu suliaqartuuneranut tatiginnittuunissaq pingaarpoq.
2. Whistleblowerit illersugaasinnaanissaannut inatsik toqqammaviusussaq aallarnisarneqartariaqarpoq. Pingaarutilik, 2023-mili piareerlugu suliaareersimasusatur takorluugaasimagaluaq. Massakut takorluugaavoq 2024 Inatsisartut Upernaakkut ataatsimiilerpata aaliangersaaffineqarumaartoq.
3. 3) Ammasuunermet nersornaat. Siullermeerluni 2023-mi tunniunneqarpoq, takorluugaavoq ammasuunermet nersornaasiisarneq ukiumoortumik ileqquusussamik tunniunneqartalerumaartoq.

2024-mi peqquserluttarneq akiorniarlugu suliniuteqarnitta ingerlateqqinnissaanut qilanaarpugut.

*Inussiarnersumik Inuullaqqusilluta
Transparency International Greenlandimi Siulersuisut*

*Inuk Lundblad, Karen Heilmann Lennert,
Christian P. Jerimiassen, Birita í Dali, Melissa Geisler,
Mayada Mohamedani, Martina Sommer, Simone Bruun*

AQUTSISUT NALUNAARUSIAAT

SAMMISAT PINGAARNERIT

Transparency International Greenland (TIG) kajumissuseq tunngavigalugu sulliviuvoq, Kalaallit Nunaanni peqquserluttarneq akiornarlugu sullissivittut immikkoortortaqarfik Nunarsuaq tamakkerlugu ingerlassiviup Transparency Internationalip ataani inissisimasooq (Immikkoortatut). TIG Transparency Internationalimit 2022-mi akuerisaaqqippooq taamaalilluni immikkoortatut ingerlaqqissinnaangorluni.

Peqatigiiffiup siunertaraa, peqquserluttarnermik akiuinisani, nunap iluani nunarsuullu sinnerani, tamanna ingerlavoq Transparency International, suleqatigalugu. Peqquserluttarneq nassuiarlugu imaappoo pissaanermik tunniunneqarsimasumik atornerluineq/peqqusersaarnaq nammineq iluanaaruteqarusunnermik siunertalimmik. Peqatigiiffiup peqquserluttarneq akiornarlugu uku inassutigai qullersaqarfinni tamat malinnaaffigisinnaasaannik ingerlariuseqalernissaq, suliffeqarfinni ammasumik ingerlariuseqartoqasasooq kiisalu sutigut tamatigut ataatsimut isigalugu inuiaqatigiinni akimut ersarissaasoqartassasooq peqquserluttarnerlu taassumalu kingunerluutigisinnaasai pillugit taamataaq inuiaqatigiinni qaammarsaasoqartassasooq.

Peqatigiiffippat pisussaaffilernikuuvoq Transparency Internationalip maleruaqqusutaanik malinnaassalluni, inatsisegarneranut, allaffisornikkut ingerlariusaannut il. il. Namminersortuuppata pisortatigut ingerlatsiviuppata periusaasigut alapernaaserfigalugit peqquserluffiunersut imaluunniit peqquserlunnermut akiuinersut sanngiiffeqarsimappata sanngiiffiiniq oqaluttuullugit pitsannguutaasinnaasunillu siunersuuteqarfigalugit.

SAMMISATIGUT ANINGAASAQARNIKKULLU INERIARTUUTIT

Ukiumoortumik naatsorsueqqissarnermi inernerit malillugit 48.264 koruuninik amigartooruteqarpoq siornamut iluanaarutsinnut 96.026 koruuninnut amigartooruteqarput. Peqatigiiffiup aningaasaqarnera, ilaasortat akiliutaanik kiisalu aningaasaateqarfinnit tapiissutinit ingerlasuuvoq. GrønlandsBankip Inuussutissarsiornermut Aningaasaateqarfia 75.000 kr.-ninik tapiissuteqarnikuuvoq sammisassianut pilersaarusiukkanut allaffissornermullu ingerlatsinermit siunertalikkaniq taava aamma Tips- og Lotto siunertanut taak-kununnga 90.000 kr.-ninik tapiissuteqarluni.

Sammasagut annertupput eqqarsaatigigaanni imaammat siulersuisut akissarsinertaqanngitsumik kajumissutsimikkut sullissinerisigut ingerlassaasarmata. Allaffippat akilimmik sap.ak.-nut akunnerit 15-t sulisoqartarpugut. TIG-p periusissiaa 2021-2025, Transparency Internationalip periusissiaani 2030-mi, maleruaqqussutit "Holding Power to Accountimiittut" malillugit suliaavoq.

TIG-p 2023-mi tusarniaanerit arfineq-pingasut akissuteqaateqarfiginikuuai.

UKIUMOORTUMIK NALUNAARUSIAQ

PERIUSISSIAQ

Siulersuisut pimoorussassamissut qitiliullugit 2021-2025-mut anguniagassavitik arfinillit aaliangersaateqarnikuupput ima qulequtserlugit *Transparency International Greenlandip akimut ersarissanissat pillugit, pissaanermik atornerluineq peqquserluttarnerlu akiorniarlugit oqallifinni, nipi pingaarutilik ersarisoq atorlugu peqataasarnemigut, inissisimaffini nukittorsarniarpaq*. Periusissiaq link¹ aqutigalugu nassarineqarsinnaavoq.

1. alapernaasertussaq
2. ilusilersuinerlut suliallu ingerlanneqarnerinut sunniuteqaqataasinnaaneq
3. ilisimasani katersaateqarfik
4. kattuffik attaveqaqatigiinnikkut erseqqissoq
5. nunatta iluani peqquserluutaasimasunik ilisimasaniq siammarterineq
6. aningaasatigut isumannaatsumik toqqammaveqarneq

KOMMUNE QEQERTALIMMI PIKKORISSARNISSAQ/AALIANGERSIMASUMIK QULEQUTALIMMIK

Transparency International Greenlandip Kommune Qeqertalimmiik qaaqquneqarnini tigulluarpa Kommune Qeqertallip peqquserluttoqartarnera immikkut qulequtsiullugu kommunalbestyrelsimi ilaasortanut nunaqarfinnilu aqutsisunut sammitikkusummassuk.



Borgmester Ane Hansen
tikilluaqqusisoq

Ullormilu tassani Transparency sinnerlugu siulersuisuni ilaasortap Melissa Geislerip allaffimmi pisortap Bodil

1 www.transparency.gl/publikationer

Karlshøjip taaguutit innersuussutillu suliamut tunngasut ammasuunissamat pissaanermik atornerluisarnenut peqquserluuteqartarnenullu tunngasut sammitissimavaat. Pikkorisaanermi tunngaviusimapput kommuninut atortusiatut quppersagaliaq peqquserluuteqartannginnissamullu quppersagaliaq. 34-t peqataaffigisimavaat. Soqutiginnilluarlutik. Piffimmilu pisimasunik assersuutiniq saniatigut ilanngussisoqallattaalluni. Tamat naapittarfiini pissuseris-saarnissaq maleruaqqussutillu oqallisigitiinneqarputtaq. Tatigeqatigiilluni oqalliseqatigiinnerni Chatman House Rules toqqammavittut atorneqarput.

Sammissaqarnermi ataatsimut isigalugu tunngaviuvoq "tamattat oqartussaagaataannissannut qinikkanut tatiginnin-nissaq toqqammavittut pigisariaasoq", assorsuarlu oqallisiginissaanut soqutiginninneq annertusimavoq. TIG-p kommunalbestyrelse suliamik ingerlatseqqinissaanni ingerlalluarnissaannik kissaappai tigussaasunik politikikkut pil-ersortugassatigut kiisalu tunissuteqartarnerni pisiniartarnernilu maleruaqqussutiniq sanaartornissaannut kiisalu kommunip pissuerissaarnissatigut maleruaqassaminnik ersarisaateqarnissamikkut akunnerminni oqalliluarnissaannik kissaallugit.

SUMMERSCHOOL ON INTEGRITY

Mayada M. Mohamadadi, TIG-mi siulersuisunut ilaasortaq: "Juunip ulluisa 26-30-nut 2023 Transparency Internationals School on Integrity peqataaffigaara, Litauenimi Vilniusimi ingerlanneqartoq. Sapaatip akunnera taanna tamarmi tiguartisanarpoq, ileqqorluuteqartarnermut innarligassaangissutsimullu ilisimasakka ilaartungaatsiarakkat, taassumalu saniatigut suatigut inuttullu attaveqaqatigisinnaasarpas-suannik pisaartorlungalu saniatigut ataatsimoorfinnik nu-taanik ataavartussanik aamma pisaartorlunga.

Sammissassartai siammassissunngorlugit aaqqissugaasi-mapput, sumorsuarmut tunngasuullutik. Assersuutigalugu timersornerup silarsuaani ileqqorluutaasarsimasunik eqqartuivugut, whistleblowerinut tunngatillugu inatsiseqarneq, ileqqorluuteqartarnenullu akiuiniarnerni sakuusinnaasunik tigussaasunik atorluarneqarsinnaasunik sammisaqartinneqarluta. Sammissaqartitsivinni saqqummiunneqartuni uannut tupinnartumik aalaallatsitsinut ilaavoq Fidelia Onoghaifep, Nigeriami Hollandimiut ambassadeqarfianni ileqqorluuteqartoqarneranik apuussereernerme kingorna soraarsitaasimanini oqaluttuarimmagu. Aqquusaarsimasani oqalutturai, qanoq whistlebloweriusimanini kinguneqartitsinersoq, nammineq isumannaatsumik ilurusullunilu inuunissaraluanis kisimi eqqorneqaannarani ilagisannngui ilanngullutik eqqugaasimallutik, taanna tusagaq uannut qamuunarujus-



Summer School on integrity. Vilnius juni 2023

suaq aalassatsillunilu attuingaatsiarpoq. Taanna oqalut-uarsiaara Kalaallit Nunaaliaatissavara, qanoq nunatsinnut tulluarsakkamik whistleblowerinut inatsisitigut illersuutaasinnaasunik pilersitsinnaanissarput eqqarsaatigalugu. Sammisaaq alla uannut tiguartiffiusimasooq tassaavoq, pisortatigut innarligassaannigussitsimut tunngasunik, itisiliilluni sammisaqartitsinikkut sungiusarneqarneq Tanya Azuajemit ingerlanneqartoq. Tassani pissarsiaaraakka sakkussat tigussaasut ulluinnarni nalaatanut tulluarsarlugit atorneqarsinnaasut. Taakkua saniatigut uannut pissarsiaqaataalluarsimasooq tassaavoq ullaakkut naapeqatigiilluni avitseqatigiittarneq, immikkut tamatta nunagisatsinni sunik qanorlu misigisaqartarsimaneraluta peqquserluuteqartarnerup tunngaatigut, tassani aamma oqalugiaateqarlutik saqqummiisimasut ataasiakkaat peqataasarlutik.

Tigussaasumik oqaatigalugu Transparency Internationals School on Integritymi peqataanerma ilisimasassarpassuarnik nutaanik immerpaanga, teoriitiskimik piviusumilu atorluarneqarsinnaasut, sulilluatorsuarnillu eqiingasunik inuusuttunik nunarsuaq tamakkerlugumeersunik attaveqateqalerlunna, ilisimasannik avitseqateqarsimavunga, utimuanillu nammineq Kalaallit Nunatsinni iluaqutaasinnaasussanik ileqqorluuteqartamernut qanoq ilillluta akiusinnaanissatsinnut isumasasannaasunik pissarsillunna allarpassuarnillumi.”

TRANSPARENCY INTERNATIONAL SUMMIT 2023


Transparency Internationalimi immikkoortortaqrarfiit 100-t ukiumoortumik inuit attaveqatigiittarfii aqquqigalugit ulluni pingasuni naapeqatigiissimaarput. Ataatsimeeqatigiinnerminni ataatsimoorussassaminnik periuissiamik oqalliseqartarput workshoppiliorlutillu qulequttat assigiinngitsut eqqartuiffigalugit suliarisarpaat. TIG-p peqataaffigiva workshoppeq Small State Big Impactimik qulequtalik.

ANNUAL MEMBERSHIP MEETING 2023

Immikkoortortaqrarfinni 100-juusuni aallartitat november qaammat ukiumoortumik ataatsimeersuaqatigiipput. Tamanna ingerlanneqarpoq inuit attaveqatigiittarfiisigut.

Qinigaaffiit marluk ingerlareerluni Delia Ferreira Rubion tunuarpoq. Siulittaasutullu qinigaavoq Francois Valérian. Tamanullu atuuttussanik marlunnik aaliangersaasoqarpoq, periuissiap ataatsimoorussap Holding Power to Account-ip saniatigut immikkoortortaqrarfinnut tamanut atuuttussianngortunik.

TI-Kalaallit Nunaat ataatsimiinnermi iliuuseqqaataalluni peqataavoq.



Transparency International Ukiumut ataatsimiinneq 2023

AVIISIMI ALLAATIGISAQ: TATIGINNINNEQ TAMALLU OQARTUSSAAQATAANNERAT

Tamat oqartussaaqatassappata, siullertut qinikkanut tatigininneq, piunasaqaatitut piusariaqarpoq aprili 2023 aviisimi Sermitsiaq saqqummeq.

”Tamat oqartussaaniisaallu paaralugu immitsinnut paarisariaqarpugut. Tamat oqartussaaniisaannut tatiginniisinaaneq tunngaviulluinnarpoq. Tamat oqartussaassusaannut tunngaviliisuusarpoq, aaliangersaasussat oqartussat qinikkanik inuttaqaraangata. Taamaattumik pisariaqartipparput tatiginniisinaanisarpur, ilumut qinikkat nuna pillugu pitsaanerpaamik iliuuseqarniartarnersut kiisalu iliuuseqarniarnerminni inatsisit atuuttut tunngaviginaat.

Qinikkat qulakkeertussaavaat pisortaqaqfitsik, ingerlatsinermikkut ilumut inatsisinut maligunnersoq, aaliangersaniarnerrillu ingerlassatik tamanut ersarissumik malinnaatitsillutik takujuminarsakkamik suliaannersut, iliuuserisanut suna suullumi tunngaviunersut. Tatigininneq attuumassuteqarfinnut iliuutsitigullu pileriartuaartinneqartarpoq.

Allaaserisaq tamakkiisoq uunga iserlutit atuarsinnaavat <https://transparency.gl/aktuelle-aktiviteter/>

NAALAKKERSUISUNUT ALLAKKAT AMMASUT

Juullip qaammataani siulersuisuunerit allakkanik ammasunik Naalakkersuisunut nassiussaqarput. Allakkat Sermitsiami 29. december 2023 AG-milu 3. januar 2024, saqqummersuni takuneqarsinnaapput.

”TIG iluarisimaarinnilluni maluginiarpaa, Naalakkersuisut EU-lu isumaqatigiissusiorsimasut, nunat tamat niueqatigiitarnersigut immiut akilersinnaasutigut aatsitassarsiornikkut suleqatigiinnarlutik.

Kalaallit Nunaat avatangiisinut, silap pissusaanut, inooqatigiinnut, inuiaqatigiinnullu akisussaassuseqalernissamut maleruqaqqussutit iluini pilersaarusiornissatigut nunarsuarmut tamarmut atuuttunut, maleruttussanngussalluni. Pilersaarusiornissatigut suleqatigiissusiornissaq isumatusaarnervoq, taamaattoq TIG-mi amigaatiginartipparput ileqqorluuteqartarnert akiorniarlugit suliniuteqartoqarnera taaneqarsimannngimmat. ...

Allagat atuagit: link

<https://transparency.gl/aktuelle-aktiviteter/>

SULIAT NAAMMASSISAT/ TUSAGASSIUUTITIGULLU NALUNAARUSIAT

Tusagassiuutitigut nalunaarusiat tamakkerlugit nittartakkakut transparency.gl-kut takuneqarsinnaapput

- **Aprili:** Ataatsimeersuarneq 2023-mi aamma Transparency International Greenlandip pisassanik agguasarneerup tungaatigut periuasaartunik ersarissaasoqarnissamut ujartuivoq.
- **Juni:** Siullittaasunngortoq
- **Oktobari:** Pasinapiluttoqarneranik kalerriisoqarsinnaatitsineq
- **Novembari:** Kalaallit Nunaanni Ammasuunermut Nersornaat
- **Decembari:** Aviisi Sermitsiaq 2023-mi Kalaallit Nunaanni ammasuunermut nersornaammik nersornaaserneqarpoq

FACEBOOKIKKUT SAMMISAT OQALLISSAARUTIGINILLIT

- **Aprili:** Transparency pisassiissutinik nutaanik neqeroortitsineq isornartorsiorpaa
- **Maaji:** Peqquserlunermik akiuinissamut isumaqatigiissut imaluunniit peqquserlunermik akiuinissamut iliuussissiaq. Transparency International Greenlandip taper-sorsorpaa nunat akimorlugit peqquserluuteqartarnernut akiuniarlutik sorsoqatigiittarnissartik Europamiuppat Nunarsuulluunniit sinneraniuppat apeqqutaatinnagu.
- **Juni:** Inuk Lundblad siullittaasuugallartoq
- **August:** Kommune Qeqertalik. Summerschool pillugu
- **Septembari:** Soraarfiup nalaani tatigininneq pillugu ataatsimiitsilerutta
- **Oktobari:** Kalerriisunik illersuineq pillugu inatsissatut siunnersuut Inatsisartut siullermeerlugu oqaluuseris-savat. ECAp ataatsimeneq
- **Novembari:** Ammasuunermut Nersornaat
- **Decembari:** International Anti-corruption Day

ILAASORTANIK ATAATSIMIISITSINERIT

- Martsip ulluisa 28-at, nunarsuaq tamakkerlugumut peqquserluttarneq akiorniarlugi ataatsimeersuortoqarnera, Washington DC-mi Juullip qaammataani 22-mi ingerlanneqartoq, Christian P. Jerimiassenip Simone Bruunillu oqaluttuarimmassuk. Oqallisaavoq: Nunarsuarmiogataaneq uagutsinnut qanoq isumaqarpa?
- Karen Heilmann Lennertip Nordic Business Ethicsinut, Kalaallit Nunaata peqataasimanera oqalutturaa, nunani avannarlerni suliffeqarfinni, pissuserissaarnissaq pillugu. Misissueqqissaarneq. Oqallisaavoq: Tamakkunuu-natigut TIG-p misissueqqissaartarnini ingerlatiinnassavaa?
- Septemberip ulluisa 20-at, Najaaraq Demant-Portip, Ilimatusarfimmi ilinniartitsisup, Tatigininneq & Inger-

latsivinnillu aaqqissuussinerit, pillugit ilisimatusaatini oqaluttuarimmagu. Global Corruption Barometerimmita takutitaanut, tatiginninnermut taama annikitsigisumut, suut peqqutaasimassappat? Politikikkut tatiginnissuseqartariaqarpugut imaluunniit allatigut tatiginninnermik pingaartitaqarneruvugut, Nunatsinni pissutsit eqqarsaatigalugit?



Najaaraq Demand-Portip ilisimatusaatini oqaluttuarigaa

WHISTLEBLOWERIT

Ukiaanerani ataatsimiittoqarmat 2022 aaliangjunneqarpoq inatsisissamik, whistleblowerinut illersuutissamik, sanalluni aallartittoqassasoq. TIG-p ukiuni arlaqalersuni uteriilluni inassutigisarsimavaa, pingaarutilimmut tassunga alloriaateqaqqullugit. Ikiutaaffigisinnaallugu neqerooruteqarnikuuvugut inatsisissallu sananiarneqarnerani ataasiarluta ataatsimeeqatiserineqarnikuuvugut. Inatsisissaq siullermee-rutaasumik aappasaanerutaasumillu 2023-mi sammineqarpoq, ataatsimiititaliaq eqqarsarfeqarumammat, pingajusaaneerneqarnissaa upernaamut 2024-mut utaqittariaqalerluni.

Inatsik sammineqarmat ulloq taanna facebookimiit tigusat

PEQQUSERLUTARNEQ AKIORNIARLUGU ILIUSISSIAQ

TIG-p ataavartumik qasusuilluni Kalaallit Nunaat kajumisaartuarpa Naalagaaffiit Peqatigiit isumaqatigiissutaannut ilannguteqqullugit. Aammalu tamanna 2023-mi anguneqangajaqqinnaarpoq. Inatsisartut ataatsimiinnerminni siunnersuutitaa sammimmassuk. Siunnersuulli itigartinneqarpoq taarsiullugu Naalakkersuisut peqquserlutarneq akiorniarlugu iliusissiamik sanaqqusippat. Iliusissiap imarisassa tassaasapput iliusissat tigussaasut. TIG-p ulloq mannamut taassuma iliusissiap naammassinissaa pissangalluni utaqqivaa, naatsorsuutigaalu tamanut tusarniutigineqaqqaarumaartoq aaliangersaaffigineqartinnani.

REGION ECA-MI IMMIKKOORTORTAQARFIIT QULIT ALLAFFISSORNIKKUT PISORTAAT

Covid 19-qariillarmalli siullermee-tumik allaffissornikkut pisortat aallartitallu naapeqatigiippat Berlinimi Transparency Internationalip qullersaqarfiani. Ataatsimeeqatigiinneq ingerlanneqarpoq Montenegromi Oktoberimi. ECA Europamut Centralasiemut naalisaataavoq, tassungalu Regionimut ilaappat Canada, Island Kalaallillu Nunaat.

Siunertaasimavoq misilittakkanik avitseqatigiinnissaq, regionimilu sammisassat ataatsimoorussat kiisalu ilaasortat kingumut attaveqaqatigeqqilernissaat angorusutanut ilaalluni.

Qulequttat sammisassat ukuusimapput

- Naalagaaffik inatsisit tunngavigalugit naalakkersugaq, tamat oqartussaanerata pisinnaajunnaarnera kiisalu innuttanik akuutitsiniarneq
- Aningaasat eqqunngitsumik ingerlaartut inuttaviisalu ersarinneginnera
- Whistleblowerinik illersuisinnaassuseq
- Silaannap pissusaanik aqutsineq pissutsillu peqqusersaartumik avatangiisillit
- Ammasumik, akimut ersutumik akisussaaffilimmillu pisortatigut niuertamerit
- Pisariaqanngitsumik oqartussaaffilersuineq, politikimi aningaasat soqutiginnittullu aqutsisunik sunniiniartareri
- Aqutamik pinerlunnaqatigiiffiit 'amiilaarnartumillu' annertuumik peqquserluuteqartareri

Nunani Avannarlerni Immikkoortortaqarfiit suleqatigiittarnermikkut nukittorsaaqatigiinniarlutik isumaqatigiittut tassaapput Kalaallit Nunaat, Island, Norge, Qallunaat Nunaat kiisalu Finland.



Montenegro Petrovacimi ataatsimiittarfissap silataani peqataasut naapittut

SAAFFIGINNISSUTIT

TIG-p misigisimavaa saaffiginnessutaasartut amerliartorneri. TIG nukissaqanngilaq suliassanik tigooqqaanissaminut innunilluunniit ataasiakkaanik ikiuisinnaanissaminut. Inuk pillugu paasissutissanut inatsit pillugu TIG-p saaffiginnessutaasartut tamakkunuunatigut toqqortaatisinnaasanngilaat, aammalumi saaffiginnittunut tamanna paasissutissiissutigisarlugu. Suliakkiukkusutaagalup sumut tunngasuunera apequtaatillugu innersuussuteqarfigisarpagut sumut saaffiginnessutigissaneraat, ass. ombudsmandimuusinnaavoq, politiinuusinnaavoq imaluunniill inatsisitigut ikiuisarfimmut. Siulersuisut/allaffeqarfik saaffiginnittut ataasiakkaat naapeqatigisarnikuuat, Naapeqatigiinneq siunertaligaasarpoq peqatigiiffitta siunissami suleriuserisinnaasasaanut innersuussutigisinnaasaannik pissarsiaqaateqarfigiumallugit.

SULIFFISSUAQARFINNI NAMMINERSORLUTIK OQARTUSSANIT PIGINEQARTUNI SIULERSUISUT

Ukiuni aqqanilinni kingullerni Transparency International Greenlandip ugartortuarsimavaa Namminersorlutik Oqartussat pigisaanni suliffissuaqarfiit siulersuisuini ilaasortassanik toqqaaniartoqartillugu ammasumik ingerlanneqartassaq. TIG-p kingullermik 2022-mi tamanna ujartuiffigisimavaa. 2023-mi siammasissumik politikkikkut aaliangersagaq saqqummiunneqarpoq piginnittuunermut najoqqutassiat. Alloriutinut tullinnguuttussatut ilimasuutissaagaluarpoq maleruqaqqussutinik nutarsaaneq aqutsilluatuunermik takutitserusukkaanni.

FACEBOOK

Peqatigiiffik facebookikkut 1600-nik malitseqarpoq, 3400-mik isorartussuilimmik. TIG-p tassuuna saqqummiussani aallaavittut kalaallisullu qallunaatullu allattarpai. Ataasiakkaannguit Transparency Internationalinngaaneersut ikkunneqartarput, taakkuli kisianni kalaallisuunngortinneqarneq ajorput. Tusagassiutitigut nalunaarutit, nalunaarusiat nutaat peqatigiiffillu pillugit allaaserisat aamma facebookikkut saqqummiunneqartarput. TIG-p saqqummiussai amerlasuut del-erneqartarput. Inuppaaluit aamma messengeri atorlugu TIG-mut attaveqartarput.

KALAALLIT NUNAANNI AMMASUUNERMUT NERSORNAAT

Ammasuunermut nersornaat siullermeertumik 2023-mi tunniunneqarnikuvoq. Ammasuunermut nersornaasiisarnermi siunertaavoq Kalaallini Inuiaqatigiinni innuttanik nersorinnikkusunneq, Kalaallit Nunaanni inuiaqatigiinni ammasuunissamik sulissuteqartunik, takutitserusuttunillu qanoq ileqqorluteqartronerit kinguneqarsinnaasartut. Suliniutaasalumi takutittarpaat, qanoq pingaaruteqatigisoq ileqqorlunermik pimoorussamik akiuinarluni sulissuteqartuarnissap pingaaruteqassusaa.

Aviisi Sermitsiaq 2023-mi Kalaallit Nunaanni ammasuunermut nersornaammik nersornaaserneqarpoq

2023-mi ammasumik periuseqarnermut nersornaammik tunisinissamat Ataatsimiititami ilaasortat tassaasut TIG-ip siullittaasua Inuk Lundblad, tusagassiortoq Ilisimatusarfimmilu Tusagassiornermut Immikkoortortami pisortaq Naja Paulsen kiisalu TIG-ip immikkut ilisimasalittut ilaasortaa Anita Hoffer inassuteqataasimasut tunuliaqataralugit nersornaatisissamik toqqaapput. 2023-mi ammasumik periuseqarnermut nersornaammik pinnattuvoq aviisi Sermitsiaq.

Aviisip nersornaatisineranut pissutaapput taassuma misisuilluni tusagassiornermik ingerlatsinera allaaserisaqartarneralu, soorlu aalisarnerup iluani pisassiissutaasartut aamma aatsitassarsiornermi piginnittunut tunngasut allaaserisallu allat inuiaqatigiinni pissutsit pingaarutillit pineqartillugit ersiqqissuliorlutik qulaajaasartut.

Nersornaat tunniunneqarneq ajorpoq ataasiakkaanut pissanermik atornerluineq matoqqasumillu ingerlatsineq pillugit pissutsinik qulaajaasumut aviisili Sermitsiaq nersorniarneqarpoq tamat akornanni inuiaqatigiinni ammasumik ingerlatsinerunissaq aqutissiullugu isummanik allanngortitsisariaqarnermik kaamisalluni sulisitsimmat.

Qulaajaalluni tusagassiorneq tamat oqartussaaqataaneranni pingaaruteqarlunartuuvuq. Ataatsimiisitap taamatut nersornaasiinermigut ersersikkusuppa inuiaqatigiinni tusa-

gassaqartitsinerup atuuffiani pissutsinik qulaajaasernerup Kalaallit Nunaanni tusagassiorfinni ingerlatissallugu inissaminiinera.

Aviisi Sermitsiaq 2023-mi ammasumik periuseqarnermut nersornaatisivoq sapiissuseqarluni saqqummiussisarnini pillugu, inuiaqatigiinni inukitsuni tusagassioruulluarnissaq ilaatigut ajornaatsuinnaasangimmat. Sermitsiami tusagassiorut nukuttuffigaat paasiniaasarnertik oqallisigineqartunilu saqqummiisarnertik taamalu aamma takutilugu qanoq pingaaruteqartigisoq qujaasitsisarnissap inissaqartinnissaa, oqallitsisartumik. Oqallinneq ammasumillu pissuseqarneq inuiaqatigiit isertortumik pissusilersortuunngitsut tunngavisaraat.

Nersornaatip allagartaa ammasumik ingerlatsinerup pissaanermik atornerluinermik qanitanillu salliutitsinermik akiuisuuneranik takussutissaavoq. Soorlu kuseriarnerit sikumik aseruisartut quppanillu pilersitsillutik.

Ammasuunermt nersornaammut piukkunneqartut ilaasortat, Facebook kiisalu KNR Nunatta Nipaa aqutugalugit kalerriutigineqarput.

Kikkulluunniit kajumissaarneqarput piukkussartik ataaseq nalunaarutigeqqullugu.

KATTUFFIK

Siulersuisut katitigaanerat

2023 ataatsimeersuarnermi siulersuisut nutaangorput. Karen Heilmann Lennert siuittaasutut ingerlaqqippoq, Inuk Lundblad siulittaasuup tullissaatut qinigaavoq. Christian P. Jerimiassen, Martina Sommer, Simone Bruun kiisalu Mayada Mohamedani ilaasortatut qinigaallutik. Melissa Geisler sinniussatut qinigaalluni.



Siulersuisut, april 2023

Karen Heilmann Lennert juunip qaammataani nunarput qimammagu, Inuk Lundblad qinigaaffiup sinnerani siulittaasuugallartutut inissippoq.

Siulersuisut ima inisseriataarnikuupput, ilaasortaatitat arlalilit nunatta avataani najugaqaleriataarlutik. Periusaasimagaa-



Transparency International Grenlandimi siulittaasoq Inuk Lundblad, Masaana Egede, Tusagassiorfik Sermitsiaq. AG-mi pisortaq aamma Dorthe Olsen, aviisimi Sermitsiaqmi aqqussuisuuneq

luarpoq tunuarniteqaqqaartarneq. Oktoberip naanerani siulersuisut ataatsimiinnerminni aaliangersaapput: "Siulersuisuni ilaasortat, Kalaallit Nunaanni najugaqarunnaarsimagaluarlutik, qinigaaffik tamakkerlugu atuutsinneqartasasut".

Siulersuisunut ilaasortaatinneqarput marluk ilisimatuutut inissinneqarsimasut taakkuli taaseqataasinnaatitaanngillat tassaasullu: Anita Hoffer Thomas Trier Hansenilu.

Siulersuisunut ilaasortat arlallit Nuup avataani najugaqartuupput taamaattumillu inuit naapittarfiisigut ataatsimeeqatigiinnerit pisarlutik, tamanna aamma arlaannaannilluunniit akornutissaqartinneqanngilaq.

2023-p naanerani Transparency International Greenlandip ilaasortai ima isikkoqarput: Inuinnaat 48-t kiisalu suliffeqarfiutillit 23-t.

SULIFFEQARFIIT ILUINI WHISTLEBLOWEREQARNISSAQ INNARLIISARNERMULLU POLITIKKEQARNISSAQ

Siulersuisut aaliangernikuupput, innarligaasimanermut naammagittaalliuutinik tigooqqaasinnaanissamut allaffeqarfimmilu siulersuisut inuttaannut/atorfilittanullu tunngatillugu whistleblowereqalernissamut politik kissamik, sanarusullutik. Periusarissavarput naammigittaalliuutit ileqqorissaarnermut komitemut ingerlateqqillugit tunniussisullu kinaassusaa isertuukkumallugu una maileq ethic@transparency.gl pilersillutigu.

Naammagittaalliteqarnissamut ilitsersuut uunga iserluni aaneqarsinnaavoq <https://www.transparency.gl/wp-content/uploads/TIG-klagevejledning-.pdf>

ILEQQORISSAARNERMUT KOMITEP ILAASORTAI

Thomas Trier Hansen, siulittaasoq, Simone Bruun siulersuisunit aallartitaq, Birgit Niclasen, ilaasortat qinigaat.

ANINGAASAQARNEQ

Peqatigiiffik ukiut ingerlanerini aningaasatigut isumannaatumik toqqammaveqarnikuuvoq. Tips & Lotto ukiumoortumik ingerlatsinermit 90.000 kr.-ninik tapiissuteqartarpoq. Ilaasortat akiliutaat aalaakkaasumik suli 100.000 kr. misarpiaaniipput. GrønlandsBANKIP Inuussutissarsionermut aningaasaateqarfia ukiut ingerlanerini aningaasaliisartutut pingaarnertut inissisimavoq, 2023-milu 75.000 kr.-ninik ingerlatsinermit pilersaarusiortugillu sammisassianut tapiissuteqarluni.

2024-mut GrønlandsBANKENip Inuussutissarsionermut aningaasaateqarfia nalunaarpoq 75.000 kr.-ninik tunissuteqassalluni.

Ulluinnarni aqutsisoqarfeqarnissarput pisariaqarpoq, aammattaq nammineerluta uninngasuuteqarnissarput pisariaqarluni, aningaasaateqarfinnut qinnuteqaateqarnermi. Siulersuisut ilinniartunik ataatsimik marlunnilluunniit ikiorteqarusuttarput, pissaqartilluta, aningaasat pigisat apeqqutaatillugit. Sutigut tamatigut sipaarniartuuvugut, siulersuisut aningaasaqarneq isumakuluutigisarpaat, siunissaq ungasinnerusooq eqqarsaatigalugu taamaammatt isertitaqaataasinnaasussanik nutaanik ujarlernertik ingerlatiinnarpaat.

ANINGAASAATEQARFIIT TAPIISSUTILLU

- GrønlandsBANKENip Inuussutissarsionermut aningaasaateqarfianiik; 75.000 kr Allaffissornermut pilersaarusiortugillu sammisassianut tapiissutit.
- Tips & Lotto Pulje C; 90.000 kr. allaffissornermut tapiissutit, inimik attartorneq ilaalluni.
- GE; naatsorsuutinik allattuinermi ikiortaaneq
- Tumi Consulting; inimik ataatsimiiffiusinnaasumik akeqanngitsumik periarfissiineq
- Kommuneqarfik Sermersooq; ataatsimeersuartoqarnerani oqalutseqarneq
- Kommune Qeqertalik; termokandit marluk

TRANSPARENCY INTERNATIONAL

NUNARSUAQ TAMAKKERLU ATUUTTUMIK PEQQUSERLUTTARNERMUT AKIUINIAQATIIFFIK

Transparency Internationalip anguniagaraa qulakkiissallugu silarsuaq tamakkerlugu, naalakkersuisuuppata, politikkiuppat, inuussutissarsiornermut ingerlatsiviuppat, innuttat akornaniippat inuillu ulluinnaanniippat, tamagitsigut peqquserluttoqartannginnissaa tamannalu anguniarniarpaat akimut ersarissaasarnissamik, akisussaaffeqarnissamik inarlinnginnissamik saqqummiussaqaqattaartarnikkut oqariartuteqaqattaartarnikkullu, kikkunnut tamanut piffinnut tamanut siammarterinermigut. Kattuffik nunarsuaq tamakkerlugu 100 sinnerlugit immikkoortortaqaqpoq, Berlinimi allaffissuaqarluni qullersaqarfiusumik. TI peqquserluuterpassuarnik uppersaasarpog ajornartorsiutaaneraniillu nittarsaassilluni Naalakkersuisunik, inuussutissarsiornereullu iluani ingerlassalinnik inuiaqatigiinnilu innuttaasunik suleqateqartarluni, periutsinik atuutsitsiniaasuulluni, peqquserluttarnermut akiuutaasinnaasunik innersuussuteqartarluni.

Nunani immikkoortortat najugaqarfinni kattuffinnut sumulluunniit attuumassuteqaratik suliniaqatigiiffiupput, nunagisaminni ingerlatsillutik nunarsuup sinneranut TI attaveqaatigalugu. Immikkoortortaqaqfiit tamarmik siulersuisuutitaqartarput, ilaasortaqlutik, periutsitigut maleruagassaqaqlutik nammineerlutillu aningaasaqarnertik aquttussaasarlugu, Berlinimi TI-p qullersaqarfiata ilisimasaminnik sakkussaniillu tuniorartarpaat (soorlu Corruption Perception Index, Global Corruption Barometer, NIS-metoden il.il.), kisianni sammisaqartitsinissartaa aningaasaliiffigisinnaangilaat. Qullersaarfiup allaffeqarfissuata ukiumoortumik aqqissuuttarpei piffinni nunarsuaq tamakkerlugu ataatsimeeqatigiinnissat, tamakkunani immikkoortortaqaqfiit misilittakkaminnik avitseqatigiittarput, suleqatigisinnaasaminnik nassaartarput, ilisimatusarnikkullu angusat kingullit avitseqatigiiffigisarpaat, suliniut angusat IT-p iluani tamakkiisutigut ingerlasumik.

Transparency International Greenland (TIG) aqqissussinerup taassuma ataaniipput TI-milu anguniakkanik tapersersuisuulluni.

2023 Ukiumoortumik ataatsimiinnermi marlussunnik aaliangersaasoqarpoq:

1. TI-mi sulinikkut aqutsinikkullu naapertuulluurtumik peqataatitsineq
2. Polikkikkut partiinut qineqqusaarnenilu aningasaliissutitigut akimut ersarissaasarnissatigut pitsanngorsaaniisaaq.

2030-periussissia *Holding Power to Account* ukiumoortumik ulluni pingasuni ingerlassami atortorissaarutitigut ataatsimiissutigineqartarpoq atuutsinniarneranut malitseqartisinertut.



Amerikamiut allartitaqarfiannit pulaarneq.
Bodil Karishøj, Mayada Mohamadani,
Meridith Davis aamma Simone Bruun

